

# «Per furtegna na sung ia betg en tip schi sitg»

Passa 100 mails, 20 sottascripziuns e screiver, screiver e screiver: chegl è igl mintgade da Hubertus (Huba) Fanti. Siva da passa en mez onn è el scrivant communal digl cumegn d'Albula/Alvra. Per la FMR è el davert igl sies biro e do invista aint igl sies mintgade. En mintgade magari pretensius e «sitg» tg'el cumpensescha gugent cuagl sies humor.

SANDRA BALZER/FMR

Schi *Hubertus Fanti* tschainta ve digl sies pult ainten l'administraziun communal a Casti vei el automaticamaintg igl grond regal cun nundumbrevlas scatlas greischas, signeidas cun risplei davart lur cuntign: mastranza, provedimaint, baselgia, industrieia, codesch funsil... – Las scatlas dattan perdetga tgi cò è nia luvro, tgi Hubertus Fanti ò luvro, aglmanc per ena part da tot igls contracts, plans e documaints tgi sa cattan liaint. Siva digl 1. da matg 2023 è Huba – scu tg'el nomna sasez – Fanti numnadamaintg manader dall'administraziun communal digl cumegn d'Albula/Alvra.

## «Ena scritgira miserabla»

Cun plascheir derva Huba Fanti igl isch alla redactoura, sa legrond da dar invista ainten la sia lavour. Er schi el sottascreiva cun «manader administraziun communal» seia l'expressiun «scrivant communal» anc adegna populara. Vor deir, en'expressiun tgi inditgescha er gist la sia lavour principala. «Radond 80 % è screiver», lascha el saveir ed agiunta, tg'el vegia en'affinitad per lungatgs. «Gio scu mattanegl, ia na sung betg gist chel digls chints», conceda el. Damai forsa en «clertg» per el, tgi tar en cumegn schi grond scu chel d'Albula/Alvra schea l'antiera contabilitad betg ainten la sia responsabladad.

El seia pero led, tg'el possa far adiever digl computer. «La va ena scritgira miserabla, sa strousch liger las atgnas notiztgas. Er privat na screiva betg ple brevs, va difficultads cun cartas da Nadal u natalezi.» Sen canzleia arcunescha el las tgossas scretgas digitalmaintg, e las tgossas impurtantas vignan stampadas ed archivadas ainten las scatlas greischas. Chegl seia anc adegna usit. «Digl reminent, igls anteriours scrivants comunals eran alloura fitg loschs sen lur archiv.» Ed el? «la er», rasponda Huba Fanti cun en reir.

## Passa 100 mails per de

Ena rolla pi centrala gioia la sia sottascripziun tgi Huba Fanti metta var 20 gedas per de a mang sen palpieri. «Chegl è pac an cumparegliazun cuagl mastral», dei el cun en reir. Ed a propos mastral, preparar brevs per lez e la suprastanza seia er egna dallas sias incumbensas principalas.

Aint igl discurs cun la FMR scumainza el ad enumerar igls sies ulteriours pensums, tg'el seia igl scrivant per la suprastanza ed igl mastral, liom tranter administraziun ed istanza, pero er consiglier per la suprastanza an dumondas giuridicas e l'administraziun. «La raspond dantant er igls mails,



Aint igl sies biro a Casti archivescha Huba Fanti igls documaints igls pi impurtants – anc oz vign archivato a moda analoga.

igl antier info@albula-alvra.ch, organisesch sedutas e radunanzas communalas anfignen tigl apero. E sch'igl beamer funcziunescha propi stuessa er anc vurdar mez.» I seian passa 100 mails per de. «En cumegn cun 1300 abitants ed abitants, ma igl è propi surpigliont tge tgi vign aint digl tot.»

Ed alla fegn finala vegia el er da realisar tot las decisiuns. El mossa en figl A4 cun la nova cumposiziun dalla suprastanza communal. L'antschatta december 2023 è *Martin Christen* nia eligia scu nov suprastant. «La sung er responsabel per tot las publicaziuns anvers anor.»

## «En cumegn cun 1300 abitants ed abitants, ma igl è propi surpigliont tge tgi vign aint digl ot.»

Hubertus Fanti

## En cumegn dovra en consiglier giuridic

I detta deis noua tg'el s'occupescha mintga tschintg minutas d'en oter tema e perche gl seia la lavour sen cumegn schi interessanta, dei Huba Fanti cun igls glichonts. «Chegl monta betg, tg'ins stò

esser specialist per mintga tema, per exaimpel da construcziun tgapesch ia sober navot. Pero ins pò sfunsar aint igls temas.» Prubabel la raschung, pertge tg'el ò luvro siva digl sies ampredissadi commercial tigl sies cumegn nateiv da Son Murezza, ple u manc adegna sen cumegn.

Malgro la multifariadad, la sia lavour porta er sfeidas: «I davainta veapi cumpless. Avant 40 onns ins ò simplamaintg decida, sottascretg sen en cedel e fatg. Oz stò en cumegn adegna sa sierar. En cumegn sainza consiglier giuridic na fiss betg ple da s'imaginar.» Scu exaimpel nomna el igls casteis per las persungas, tg'on ignoro igl cumond da passar durant la fasa acuta dalla bova da Brinzauls. «Chegl è ansasez ordinaziuns tot normalas, pero igl è da risguardar tantes tgossas tg'ins fetscha scu cumegn igl dretg.»

## Ena surdada difficila

Ed er el persunalmaintg na «scassa betg tot or dalla mongia». «Tottanegna vaia ena rinnada da sottascripziuns sen meisa ed alloura ta dumondast, tge fatscha ossa cun chegl?» Pinavant na seigl er betg sto simpel da surpigliar «l'ierta» digl sies antecessour *Maurus Engler* tgi seia sto 26 onns scrivant communal. «Planiso è sto en meis da surdada, gl'era pero gist la fasa intensiva da Brinzauls, uscheia tgi vagn gia peda angal en'emda per surdar las fatschentas quotidianas.»

## Led dad esser da tschel mang

54 onns dalla sia veta ò Huba Fanti passanto ainten la Nagiadegna, ò luvro sen cumegn, è sto manager da cultura e sport, è sto consiglier communal ed ò perfign candido scu mastral da Son Murezza. Siva

è el sa decida da «schlarger igl horizont» ed è ia a star a Coira noua tg'el abitescha anc ossa. Oz seia el led, tg'el possa luvrar da tschel mang dall'executiva: «Gist sch'ia vei, cun tge tg'igl mastral è confrunto de per de.» El nomna igl exaimpel dalla radunanza communal: «Lò dei nign tg'igl scrivant communal seia en tamazi.» Aint igl cumegn d'Albula/Alvra ins vegia retschet el cordialmaintg e curtaschevel. «Cò less ia star anfignen tar la pensiun», dei Huba Fanti plagn persvasiun.

Durant igl discurs rei igl canzlist Huba Fanti adegna puspe, fò l'egna u l'otra sgnocca. Er cura tgi la redactoura dumonda la sia vigliadetna, schi seia ossa 58 u 59? rasponda el cun en reir: «58, am fasche gio betg pi vigl.» Igl sies humor seia egna dallas sias qualitats da character. «Chegl è gio adegna sto uscheia e chegl geida er aint igl mies mintgade, igls temas sen cumegn è magari mecta sitgs, per furtegna na sung ia betg en tip schi sitg.»



Screiver è igl mintgade ed 80% dalla lavour digl scrivant communal d'Albula/Alvra Hubertus Fanti.

FOTOS SANDRA BALZER

## SURSES

# Infurmaziun publica e discussiun da podi davart «Nandro-Solar»

Avant tgi la radunanza communal da Surses decida davart igl implant «Nandro-Solar», anveida igl cumegn ad ena sagonda seira d'infurmaziun e discussiun agl podi.

SANDRA BALZER/FMR

Oz, glindesde anveida igl cumegn da Surses ad en'occurrenza d'infurmaziun ansemen cun l'Ovra electrica digl martgea da Turitg (EWZ) pertutgont igl project «Nandro-Solar». Siva dall'infurmaziun ò li ena discussiun agl podi.

Igl EWZ planisescha numnadamaintg en implant fotovoltaic otalpin ainten la Val Nandro sur Radons. Chel è gio nia preschento la fegn otgover alla populaziun. «Siva da chegl è igl project nia concretis e las contractivas concernent l'indemnizaziun ed igl dretg da biagier èn neidas finalisadas», screiva igl cumegn ainten sia invitaziun. A pled vign sper igl nov mastral da Surses, *Daniel Wasescha*, igls responsabels digl EWZ e *Jürg Rohrer*, manader dalla gruppa da perscrutaziun concernent energieas

regenerablas tar la Scola ota turitgesa per ciencias applitgeidas ZHAW.

## Discussiun agl podi cun quatter persungas

La discussiun agl podi vign organisada dalla Partei da liberaldemocratica (PLD) Surses. Chella moderescha *Katharina Balzer* da Radio Südostschweiz. Alla discussiun sa participeschan *Adrian Ballat*, suprastant da Surses, *Martin Bosshardt*, president digl cunsegl administrativ digl Berghuus Radons Gastro SA, *Luzi Thomann*, president digl cunsegl administrativ digl Turissem Savognin Beiva Alvra SA, ed *Enrico Uffer*, manader dalla Uffer SA.

Davart la dumonda davart la concessiun digl dretg da biagier an favour digl EWZ, per realisar igl project decida la radunanza communal digl 29 da schaner 2024.



Sen ena surfatscha da var 100 plazzas da ballape aintadem la Val Nandro less igl EWZ installar 11 625 tavlas solaras.

FOTO EWZ